

# 記載第一 中國大事記

宣統二年六月中國大事記

問 天

初一日 安徽宣城饑民搶劫糶坊

安徽甯國府屬宣城縣。近年迭遭水患。民不聊生。今年五月初六至初九日。大雨四日夜。平地水深數尺。去年已破之三十餘圩。均被沖決。十八日至二十五日。又復大雨八晝夜。山洪暴發。東西北三鄉大小數十圩。接續潰決。幸未決者。大圩四。小圩十餘而已。災民飢不得食。匪徒從而煽之。數日之中。四鄉搶劫之事。不下數十起。二十七日。距城二十五里之油榨鎮。有飢民聚衆搶劫。二十九日。北鄉新河莊（距城五十里）東鄉沈村鎮（距城四十里）先後報告。均有滋擾情事。三十日。雙橋鎮（距城八里許）有飢民千餘。到鎮滋擾。均經官彈壓遣散。至本月初一日午刻。忽有匪徒勾結災民千餘。乘划船至該鎮（約二百餘隻）蠶擁上岸。先到裕泰糶坊。搶去米二百數十石。繼又擁至查姓糶坊。撞門時。巡防營巡邏隊哨勇等向阻。並放空槍。該災民等毫不畏懼。手持刀棍。將哨勇亂打。傷及哨弁沈錦文。暨勇丁多名。搶去洋槍三支。哨勇等乃開放實槍數響。斃一人。傷二人。獲二人。餘乃解散。

初五日 民政部奏派員往德國充萬國衛生博覽會監督奉 旨依議

民政部奏稱。准外務部咨稱。准德盧署使函稱。德國撒克森聯邦。擬於明年西歷一千九百十一年五月起。至十月底止。在都城舉行萬國衛生博覽會。以研究近數十年各國所發明之衛生新理及其功效為宗旨。蒐集各種有關衛生之物品圖樣。陳列展覽。擬請中國派員赴會等因。查德國撒克森聯邦舉行萬國衛生博覽會。業於本年西歷

二月。在該國都城籌設會事宜。當經駐德使臣派員前往。並將預備開會情形。暨譯出章程。咨送外務部。轉咨臣部在案。檢閱原章。類別甚詳。舉凡平治道路。濬洩溝渠。醫療疾病。防止疫癘。及一切檢查飲食。改良居處衣服等項。無一不備。於講求衛生行政。裨益實非淺鮮。東西各國政府。無不派遣專員。前往與會。本年三月。該會復派東方股長林南攜帶會場全圖。及入會詳章等件。來請派員與會。並述會長之意。謂中國係亞洲大國。醫學素有考求。衛生之術。發明較早。深盼中國加入該會。並多攜物品。前往陳列。意極懇切。臣部以衛生行政。於地面關係甚切。當派內城巡警總廳廳丞章宗祥前往外務部。與該員接洽一切。並詳詢各國與會辦法。據稱該會由撒克森君主提倡。規模甚大。與會各國。均須預行畫定會場。並將應行陳列物品。先期預備等語。經該廳丞覆陳前來。臣等伏查該會。萃各國衛生上特有之長。實為近世創舉。亟應派員與會。實地觀摩。擬即請旨派該廳丞章宗祥為赴會監督。屆期前往。並便道考察各國警政。以資改良進步之助。所有置辦物品。並建築會場等事。即由該監督先事籌畫。其應帶醫師譯員書記等員。由該監督遴選。仍由臣部覈定。云云。

初六日 在廣東澳門之葡萄牙官遣兵攻勦過路環海盜

過路環離澳門四英里。道光年被葡人佔住。去年中葡兩國會議澳門界務時。華官欲將此地收回管理。而葡官不允。遂迄無成議。是地素為盜賊淵藪。以擄人勒贖為事。月前擄獲小童十數人。向其家索銀三萬五千元。以兩星期為限。遲則置之死地。數童家屬。惶遽無措。先稟知兩廣總督。求為設法。而華官不能為力。乃轉往澳門。稟知葡官。葡官於初六日。遣步兵八十名。前往圍緝。被賊匪放槍擊退。賊匪進據過路環砲臺。守臺之葡兵逃去。槍斃二畫兵。官一名。傷兵三名。午後葡官派兵輪復往。開放開花砲。將砲台收回。次日。葡官復派馬交砲艦。載兵前往。彼此開砲轟

擊。葡兵傷四名。斃一名。初八日。賊匪退守山洞深坑。致函葡兵艦。繳還搶去之槍枝。約彼此停戰。又經葡兵起出被擄之學生七人。及他處人八名。十一日早。葡官復派馬交及八地利亞礮艦。駛往過路環。放礮向各村轟擊。步兵隨而進攻。佔奪數村及山頂。水師亦派隊登岸。會搜各山洞。是日午刻。葡官（俗稱總督）親臨前敵。至晚始回澳門。是晚復派水師一百五十名登岸。協同陸軍守禦。以防賊匪夜遁。適是夜風雨大作。賊匪大半乘機遁去。計先後擒獲賊匪四十餘名。其後又搜獲四百數十名。然率非真匪。以被累之鄉人爲多。惟被擄之小童均已起出。又拔出男婦多名。

是役也。過路環居民。頗受蹂躪。初六初七兩日。葡兵施放大礮。人民死者無數。房屋被毀者亦不少。又擊沈漁船一艘。死者三十餘人。初十日。又轟斃荔枝灣居民數十人。十三日。又疑九澳鄉爲賊之巢穴。遂將全鄉焚盡。鄉側之林木。亦付之一炬。

事後。兩廣總督袁樹勛。電告各省督撫。略言澳門附近過路環地方。道光年間。葡人卽築有礮臺。久爲粵省匪藪。上月。新甯縣被匪擄去學生十餘人。在該處關禁勒贖。現在澳界尙未勘定。既不能照會澳督往拿。承認爲彼之屬地。又未便派兵往緝。致啟交涉。正在籌辦之際。該事主稟由澳督派人往拿。被匪擊斃數人。本月初六以後。葡又派兵圍拿。亦被匪擊退。匪乘勢佔葡築之礮臺。葡兵又傷斃數人。嗣由葡派兵輪。用開花礮轟擊。將礮臺奪回。并起出學生及他處被擄者十餘人。匪多傷斃。連日葡兵圍捕。不准行人船隻往來該處。我兵派往協捕。葡亦不願。惟現在界務正在磋商。此次葡兵剿匪。雖係事主所請。且在其所築礮臺之地。然界務究未勘定。事前竟不知照會。亦殊未合。但圍捕原因的係剿匪。且已起出被擄人口多名。恐外間謠傳不實。特先電聞。再我兵既不及協捕。然仍恐該匪

竄入內地。並慮澳兵越界滋事。已連日會商水提。飭營遣派兵輪。駛往該處防堵。另派員至澳確查。以備交涉。云云。袁總督又致外務部電云。據居澳紳民公稟。葡人侵佔界地。展拓無厭。此次藉端海盜。復侵過路環要隘。得寸進尺。欺我力弱。肆意無忌。是一日界務不清。卽一日無一定之界線。請照會葡使。派員速勘。劃定界線。以免彼此糾葛。云云。

澳門勘界維持總會。亦於其時開會集議。茲將其議案節錄於下。(一)宣布香山各鄉連日稟報過路環情形。葡兵轟斃居民。不分良歹。至於要匪。十不獲一。似此實留後患。將來尤難安枕。請本會維持。(二)宣佈旅港維持會楊君瑞階等來函。大意言葡兵此次並非剿匪。實係剿民。不過借題發揮耳。據最近消息。洋兵轟毀村鄉。慘斃多命。均是無辜良民。至於賊匪。其兇狠者逃走殆盡。擒獲者不過一二餘黨。似此害未見除。而禍已深伏。此次固葡人之兇殘。亦由我國官吏放棄主權。一任外人慘害。漠不動心。粵人何辜。遭此塗毒。請將詳情研究。補救將來等語。衆以楊君來函。均皆切要。本會自難緘默。其中尚有條陳與界務關係者。一俟共同研究。詳稟大憲辦理。衆贊成。

### 初八日 山東官兵與萊陽縣鄉民交戰殺鄉民數百人

萊陽縣鄉民。五月間暴動。(見前月雜誌)實因知縣徵收錢糧。浮收勒折。無所不至。近又藉口新政。勒收畝捐房捐人口捐等。民不堪其苦。因起而與官爲難。經縣官與之議和。業經安靖無事。至二十日。新任知縣奎保接印後。將前任所許免雜捐免折扣各款。一例取消。仍照舊科收各捐。又出示拿捕倡首抗官之連莊會會長曲詩文。適候補道楊耀林率馬步兵六十名。奉札至縣查辦。二十六日。奎知縣遂加派兵役。協同楊道之兵。赴鄉拘曲詩文。鄉人以曲爲民受禍。大動公憤。遂羣起阻抗。被官兵槍斃數人。鄉人大鬧。與兵格鬪。傷官兵數人。鄉人死者三十八人。傷者約

倍之。二十七日。鄉民散布傳單。傳集村民。曲詩文殺妻女以誓衆。示無反願意。二十八日。遂聚集數萬人。屯馬山埠。又分衆爲四路。駐守要害。楊道與奎知縣率兵往剿。槍斃數十人。鄉民愈聚愈多。抵死不散。薄暮官兵回城。鄉民卽隨至城下。三十日。遂將城圍困。時登萊青膠道徐世光。方派員偕同旅居煙臺之萊陽民人修振邦等。回籍勸導。鄉人見修等至。痛哭陳訴。願聽調和。適登州鎮總兵李安堂。第五鎮第十協統領葉長盛。率兵抵境。楊道及奎知縣乘鄉民不設備。密屬李總兵葉統領乘夜進兵。六月初八日。遂在城外與鄉民大戰。施放大礮。轟斃四五百人。傷者千餘人。鄉民退踞白林莊。又被官兵攻破。曲詩文見勢不敵。率其黨逃去。初九日。官兵又將附城村莊焚燬一空。餘衆遂散。

記者曰。開當初六日李總兵葉統領之兵未抵萊陽之前。山東巡撫孫寶琦有電致軍機處。略言據東海關道電。有寓煙萊紳稟稱。愚民被脅。實非甘心叛逆。已電飭該紳等速回籍勸散。但能悔悟。決不株連。並派招遠縣王蓋臣越境勸諭。頃又派前署萊陽縣張學寬間道往覓紳耆。廣爲傳諭。解其脅從。以孤曲逆之勢。傳聞萊境男女聲言官紳逼納雜捐故變。操之過急。恐各處響應。愈難收拾。已電飭將領等一面宣撫。如無抗拒干犯情事。不得妄行搜剿。必先解散脅從。方可密拿首要。頃又派前任海陽縣道員陳公亮。前往查辦。勸撫兼施。免與曲黨勾結。據協統葉長勝登州鎮李安堂歌電。各隊先後均抵萊境姜山。距城百里。現據紳民求緩進兵。願認勸解。出示限初七日一律解散。庶可矜全被脅愚民。首要仍當嚴拿。若至限不散。初八日准卽進剿等語。又據東海關道徐世光電。寓煙商學界十二萬人。已分班回籍勸散。並遴委崔令齡續偕同往。專注解散。以孤曲匪之勢。又據警局赴萊探回稱。初三日。有衆集城下旋散。衆口深盼委員調停等語。查萊民聚衆。多係被脅鄉愚。大兵壓境。爭求解散。已可概見。遽加剿捕。誠有

不忍。果能悔過輸誠。自當仰體 皇仁。寬其既往。若如期不散。祇得迎勦。云云。似孫巡撫初時亦深知萊陽鄉民必有冤屈難伸之隱。本無必欲縱兵剿殺之意。其後萊陽縣奎保及查辦委員張學寬之稟。則極言鄉民攻城之猛烈。邀截官兵之猖狂。李總兵葉統領之電。歷言鄉民之圍攻城池。焚掠地面。抗拒軍隊。戕害兵丁。罪若不容於死。官之言。可信歟。為鄉民呼籲者之言。可信歟。南北各報紙均為萊民呼冤。並極言官兵之不法。不得而知矣。惟初八之役。既言兵民交戰至烈。然官兵止陣亡一人。傷一人。據稟報。而鄉民之死者。據報紙言。約有五六百人。即官自言。亦有百名左右。嗚呼。難言之矣。

初九日 派員往四川雲南貴州甘肅新疆等省考試法官

法部奏稱。憲政編查館奏定法官考試任用暫行章程內開。距京較遠交通未便省分。由法部將通習法律人員。開單奏請。簡派。前往各省。會同提法使考試。本年三月。臣部具奏施行細則。指定派員往考省分。以四川廣西雲南貴州等省共為一路。甘肅新疆共為一路。由臣部遴選京官五品以上人員。出具考語。開單奏請。簡派。每省以二員為額。定以八月初旬舉行各等因。均先後奉 旨允准在案。除廣西一省業經奏明變通。提前辦理。於上月十三日請 旨簡派該省按察使會同提學使考試外。其餘四川雲南貴州甘新等省。約計各路程途。應即派員前往。庶於奏定考期。不致有誤。臣等謹就臣部專門法律學有根柢者。並據各衙門開送通習法律五品以上實缺人員內。慎加遴選。分別次第。繕具清單。恭呈 御覽。擬請明降 諭旨。簡派每省二員。前往會同考試。云云。是日奉 旨。四川著派張丕基陳棣堂。雲南著派何奏篋蕭之葆。貴州著派林肇朱汝珍。甘肅新疆著派李擢英蕭丙炎。

初十日 諭以黑龍江大水為災發給帑銀二萬兩散賑

黑龍江巡撫周樹模電奏。江省本年入夏以來。陰雨過多。至五月下旬。連日大雨。各處江河暴漲。汎濫為災。愛琿坤河水發。屯居被淹。雨雹寸餘。禾苗傷損。嫩江龍江地畝。亦多被淹漫。秋收失望。大賚廳屬塔子城地方。積雨生蟲。食禾殆盡。云云。故特降 旨發帑施賑。

### 十三日 浙江餘姚縣鄉民暴動搗毀學堂

浙江紹興府屬餘姚縣距城西鄉五十里吟山衛。於五月間。有相離七八里之倪家路。舉行神會。夜間行至吟山時。忽藉端滋事。向各店騷擾。並將某鞋店中能姓搶去重毆。遍體鱗傷。該鎮紳民大憤。請縣官拘拏為首之人嚴辦。並永禁迎神賽會。六月十三日。縣差至鄉捉人。該會中人鳴鑼聚眾。多至千餘人。毆辱縣差。並將神像舁至吟山城。擁至馬紳榮階家。將房屋器具搗毀一空。衣飾細軟。損失不貲。復到該鎮鳳山初等學堂。搗毀校舍。並毀及附設之簡易學塾。又新組織之毓慶女校。校具什物。搗毀淨盡。十四日。知縣湯某至鄉。擬將滋事之首犯帶去懲辦。詎該犯等竟又鳴鑼聚眾。欲與湯知縣為難。湯見聲勢洶洶。急將衣冠卸去。始得免。

先是甯波府屬奉化縣唐村地方。亦有搗毀學堂之事。此學堂為袁恆元袁菱舫袁南紹等所開辦。反對者頗不以為然。五月二十二日。被鄉民搗毀一空。並將學董袁恆元等三家一律搗毀。

### 十四日 籌辦海軍大臣載洵奏陳前往美日二國考察海軍奉 旨依議

去年。籌辦海軍大臣貝勒載洵。海軍提督薩鎮冰。出洋考察海軍事宜。周歷英法德義奧俄六國。時已歲闌。即取道西伯利亞鐵路回京。尚有美日二國未往。故奏請於今年七月補往。先赴美國。次赴日本。

### 十五日 河南長葛縣鄉民滋事縣署被毀

記載第一 中國大事記

河南長葛縣。忽傳有加徵地丁之謠言。鄉民擁至縣署探問。不逞之徒。意欲乘機劫物。乃率衆搗毀大堂。并及內宅。知縣江某專電至省告急。十七日。省兵至縣。許州知州徐某亦親往彈壓。衆即解散。事後。該縣各堡首事。雖尙傳單會議。惟尙無暴動之事。

同日 江蘇桃源縣鄉民滋事毆傷宿遷縣知縣

江蘇徐州府屬宿遷縣洋河鎮西南十五里。有地名三埠者。與桃源縣接壤。是處有堰一道。兩縣人民。屢因啟堰洩水。聚衆械鬪。今年伏汛較大。本月十四日。此埠村董蔡姓與宿遷縣知縣汪寶增議欲啟堰。十五日。汪知縣帶徐淮駐防馬隊二十名至該處。飭差役村丁開堰。桃源鄉民。長跪乞免。汪知縣不聽。並喝令拿人。旋越堰至桃源縣之村董家。其時該村壯丁。早伏於附近高梁地內。一聞拿人之令。立即羣起執械。將已拿之人奪回。復將汪知縣乘輿擊毀。衣物毀棄殆盡。左腿並面部。均被木棍搗傷。有一鄉婦。竟用刀向官砍去。幸小隊用槍桿擋住。未大受傷。聞鄉民并安設巨礮一尊。擬向宿遷轟擊。幸燃點三次。均未著火。後汪知縣經差役等極力救護。復經村董周徐二人將鄉民喝阻。始得逃回。

十八日 諭以貝勒載洵充參預政務大臣

二十日 外務部尙書梁敦彥因病開缺 諭以鄒嘉來補授外務部尙書兼會辦大臣

二十一日 諭飭江蘇江海關道維持上海市面

上海於是月十五十六日。連倒大錢莊三家。虧欠中外公私款項數百萬。市面大震。各國商人所設銀行。因不信中國之錢莊。欲將所放之款收回。市情尤恟懼。當由兩江總督張人駿據實電奏。陳明辦法。當於二十一日。奉旨張

人駿電奏。上海正元兆康謙餘三家錢莊。同時歇業。債務糾葛。滙局岌岌。籌議大致辦法等語。著即按照所籌各節。妥爲辦理。並飭上海道將善後事宜。悉心籌畫。慎防流弊。以維市面而定人心。欽此。其後卒由江海關道代各錢莊向各國銀行借銀三百五十萬兩。以資周轉。始略鎮靜。

按今年各埠錢莊倒帳之案。月有所聞。其最著者。杭州於四月間連倒鼎記慶餘兩家。鼎記虧六十餘萬兩。慶餘虧四十餘萬兩。六月間。又倒阜生一家。虧三十七八萬兩。漢口源茂隆錢莊。於三月底倒閉。虧一百餘萬兩。又倒元泰太昌承豐三莊。各虧十餘萬兩。武昌於四月間又倒德泰裕公泰裕兩錢莊。共虧二十餘萬。此外爲數較少。及在他埠者。尙不可勝計。

### 二十五日 諭飭各省督撫慎選牧令責成道府察訪州縣賢否

山東萊陽縣之變。實源於知縣及紳士之勒捐。卒釀成慘殺多命之禍。至是事漸上聞。言官亦極論其事。故特降此諭。中有爲牧令者。必當勤於理事。通達民隱。凡涉地方行政。添籌捐款。應於事前剴切曉諭。集耆老子弟。告以此事之所以然。又善用士紳。莅之以嚴察。則疑謗之端自少。謠言無自而生。即間有特強抗阻者。核其情節。擇尤懲治。一二人。公道旣彰。斷無激動衆憤之理等語。又言紳士憑藉官勢。不諒輿情。甚或借端抑勒。挾私自肥。百姓以爲厲己。則怨讟叢生。馴至布散謠言。釀成事變云云。朝廷明見萬里。照及覆盆。爲萊陽言之。抑不僅爲萊陽言之也。

二十六日 諭飭各部院堂官各省督撫嚴治貪官污吏查辦事件大臣遇有關贓款之案件必須秉公澈究并 諭飭自貴戚以下及內外各大臣敦品勵行整躬率屬